

FOLA TI PRIJATEJICE, VIŠKO VALO LIPOTICE

Fola ti ca si uvijek toti ti kad nikoga ni
kad je grubo vrime
kad su u dušu plime

Fola ti ca uvijek imoš vrimena
samenom se razgovorat
cuvat naše rici
nikome jih ne odovat

Opit ću ti veceras doć
di ćemo se noć?

Pod Kanariju, Vinariju, Peškariju, Batariju?

Ca ćeš obuć?
Onu zelenu veštu nagrišponu
ili onu modru inkolonu?
evo da ćeš se opit u novo inparat
ocima novu lipost darovat

Koja to modna pista more tvoje vešte pokozat?
Koji maestro tvoju muziku osvirat?
Koji slikar tebe letratat?
ne zno se jesi lipjo iz mora ili s kraja
ca ti lipo stoji :
od Češke vile, punte od biskupa, Basulinke,
Bandirice i Luškiga barda kuraja
na kojoj je Prilovo medaja

Tuga me čapo
kad ti se jahte i kočje jušto na glovu inbarkaju
kad mi te sakriju, išporkaju
dojde mi da ih svih razmaknem
da se tvoje lipote dotaknem

Manko onih ca bi te agvantali
i u cas rastaramejali, deštrigali
ma mi te nećemo svakome u ruke dat
nećemo te ni po zloto prodat
jer ko bi nom vej:
tu širinu, tu modrinu, tu dubinu
tu tišinu mogal dat

Obo cemu ćemo se veceras razgovorat?
opita su ti jastoge izili oni ca nisu lavurali
a bukvine oni ca su kopali
opita su dica plakola jer su stariji jidni bili
opita su niki ni krivi ni dužni bili bidni
Opita su velike glove:
zapovidali, prtili, strašili
varole, pucole, ubivali
Opita je bilo veći žalosti nego radosti

Znom da ćeš me tišit kako nindr provdi ni
znom da ćeš mi provjat kako i u tebi
uvik velo riba molu izi
Ma jo bi tila da jedon put kad se nojdemo
somo lipe stvori provjemo

Opita ću ti doć prijatejice lipotice
neću te nikad obandunat
i kad zauvik zatvorim oci
u tvoju ću krilo pocivat

AUTOR PJESME

LINA BLAŽEVIĆ

Lina Blažević